

國朝耆獻類徵初編卷百六十九目錄

疆臣二十一

蘇昌

郭一裕

宜思恭

邵基

晏斯盛

盧焯

國朝耆獻類徵初編卷百六十九

通奉大夫前署江西巡撫江西布政使司布政使湘陰李桓輯
疆臣二十一

蘇昌

蘇昌滿洲正藍旗人姓伊爾根覺羅氏祖滿丕官都統自有傳父
蘇保襲雲騎尉康熙五十九年蘇昌由監生考取內閣中書雍正
七年遷侍讀十二年遷浙江道監察御史乾隆元年命巡察吉
林等處二年七月奏請於黑龍江船廠各設理事通判得旨允
行又言船廠將軍衙門及所屬甯古塔三姓白都納阿爾楚哈刑
名案件向俱船廠理刑司審理皆本處旗員通清漢文諳律例者

甚少審擬罪名多與律例不符輾轉駁詰案內干連人犯監禁日久非慎重刑名之意請揀在京員外郎主事各一筆帖式二往辦事 詔下部議船廠旗民詞訟有通判專管其理刑司員外郎無庸增惟主事由京選補筆帖式由該處選補三年襲世管佐領尋轉禮科給事中四年巡視西城六年正月署廣西按察使七月調署安徽按察使七年實授十年五月丁憂回旗仍在御史上行走十二月補工科給事中十一年正月擢奉天府府尹六月奉天各屬被水蘇昌條奏辦賑三事一奉天向來辦賑因乏公項腳價無出並不於四鄉設廠各屬幅員遼闊村民赴城領賑往返數百里情殊可憫請照例分貯米石於四鄉適中之地腳價動正項覈銷

一辦賑胥吏飯食紙筆之費因無項可動不無賠墊請酌州縣大小定其名數按日給費令不得借口需索一委員勘災監賑酌給盤費並跟役飯食儻有通同侵欺等弊嚴參治罪 諭曰所議尙屬可行而實力稽查妥協辦理則汝一人之責也勉之九月奏請查游民三事一山海關迤北至喜峯口一帶邊牆缺處游民冒險繞越請咨直隸總督古北口提督巡防奉天沿西一帶交錦州副都統率該府加謹巡查一內地游民出古北喜峯等口由八溝塔子溝繞入奉天境內請令總督提督轉飭塔子溝通判河屯協副將實力巡查一奉天之南金復雄蓋四城與山東登萊二府相對商船私載民人勢所不免奉天甲丁散居屯莊輪班赴城供差似

難坐守海濱名口又無墩堡請飭商船俱於有官兵處停泊上岸
以便稽查如無引票卽遞回原籍下部議行十四年擢廣東巡撫
十六年署兩廣總督初廣西巡撫舒輅奏於思陵土州沿邊種竹
竹以杜私越嗣土目頭人等乘勢侵夷地夷人不甘土目遽以夷
人拔竹毀牆捏報蘇昌檄道府查明押令頭人歸所侵地因奏言
鎮安太平南甯等府沿邊二千餘里處處界連交趾無論種竹難
徧設辦理稍疏必致轉滋事端請通查及早更正疏入上以舒
輅輕率舉行下部察議又奏言廣東承辦柁木案內各員覈減長
支銀三萬六千八百兩有奇前經奏明勒追不能完者各上司分
賠但分賠人員有無從著追者請再均派攤賠諭曰蘇昌此奏

非是分賠之例原專爲侵貪之員虧蝕正帑上司不早爲舉察是以責令分賠以專其責成耳覈減長支已非侵貪可比卽謂其不能實力稽查估報不行覈實亦應令賠所應賠本分而止若又將同賠案內他人應賠之分均攤代賠於情理殊未允協且既有他人攤賠將併應賠之員俱稱無力完繳徒使案牘紛繁輾轉攤派徒失政體而亦毫無裨益前因粵西張永熹一案曾經明晰曉諭今蘇昌仍有此奏或他省尚有似此辦理者著通行傳諭知之十八年正月以協拏增城逆匪王亮臣不力 諭停其議敘八月奏言瓊州爲海外瘠區貧民生計維艱查有可墾荒地二百五十餘頃請招民開墾免其升科 詔如所請十一月 命來京候旨十

九年授吏部侍郎二十年署戶部侍郎二十二年兼署工部侍郎二十四年五月署工部尙書九月授湖廣總督二十五年疏言辰州協兵每月額支米三斗每石折銀六錢前經督臣孫嘉淦以六錢不能買一石題准將停運黔米二萬石派給提標等十四標營辰州協每兵得米一石四斗又每秋預給來年一季米銀餘仍支折色自行買食查辰州偏苗疆山多田少米價素昂兵丁歲支米一石四斗及預給一季米銀僅供半年口糧其餘額支折色銀每斗六分一月之銀不敷半月之米請借朋扣銀一千五百兩差員往常德買運存俟次年本色支完後按名搭放照原買價於餉銀內扣還仍將此銀永遠存畱按年買運源源接濟得 旨如所議

行時在籍御史孫紹基指稱與臬司沈作朋同官撞騙婪贓蘇昌
奏參抵罪並請 敕部嚴定回籍之員與督撫有司彼此交結處
分部議均定爲降三級調用二十六年四月疏言湖北徵收漕耗
除支給旗丁食米餘俱照時價易銀撥充咸甯等縣不敷水腳及
養廉公用查各官養廉見有額定耗羨稅銀五十萬有盈無縮其
不敷水腳亦有各屬所贖水腳銀六千餘兩撥給不須此項耗米
變價湖北通省額穀僅五十二萬餘石續又增買賑穀四十萬石
較他省爲少且界連江浙每多撥運協濟若將此項耗米存時各
州縣附入常平額穀內則通省歲可增三萬七千石倉貯漸裕
詔如所請是月蘇昌密奏巡撫周琬情性乖張奏事多倒提年月

揜飾已過 上調蘇昌爲兩廣總督 命新任湖廣總督愛必達
秉公體察愛必達尋奏琬遇事偏執有意與蘇昌掣肘並匿災徇
庇劣員 詔革職赴巴里坤效力二十七年疏言潮州溪河經海
陽揭陽普甯三縣爲閩粵衝衢奸匪剽掠爲害請於海陽縣屬之
鰲門山揭陽縣屬之方坑楓口竹橋各設一汛兵八名以四名防
汛四名配船查緝並撥原防普甯縣外委一員移駐適中之楓口
汛往來督巡下部議行二十八年七月疏參碣石鎮總兵王陳榮
貪黷敗檢得 旨革職論罪如律十月加太子太保二十九年正
月疏言廣東社倉穀前經督臣李侍堯等酌議額貯在五千石以
上者所餘息穀照廣西例變價解貯備賑不及五千者餘息併入

額穀內部議准行臣查廣東社穀捐自民間與廣西出自常平餘
息者不同且廣東產米不敷民食社穀自宜多貯以補常平不足
若因額貯過多卽將息穀變價遇歲歉再買給賑是糴於穀賤之
時而糴於穀貴之日一石原價不能得五六斗見糧且赴司領銀
往市易穀跋涉實多未便請嗣後息穀不拘額數統存州縣備賑
免其變價解繳庶積穀日見充盈疏入 詔如所請六月調閩浙

總督先是蘇昌以廣東鹽運使王槩列計典卓薦而槩於督糧道
任內浮收倉穀虧帑婪贓至是爲廣東巡撫明山所劾御史羅暹
春因劾蘇昌在粵年久不能及早舉發非年老糊塗卽有意瞻徇
況近在同城豈真一無見聞不効反舉不公不明豈復堪節制海

疆 諭曰此奏是失察之咎蘇昌實不能辭至節制海疆乃出自
朕簡用非御史所當言羅暹春著飭行蘇昌明白回奏八月 諭
曰前御史羅暹春參劾蘇昌保舉運使王槩一摺在蘇昌於屬員
虧帑旣漫無覺察又登之卓薦自有應得之咎言官據實指參乃
職所應爾是以批發諭旨初不以爲非是特其摺內有若非年老
糊塗卽屬有意瞻徇措詞忿激幾於唾罵其意若有必欲甘心於
蘇昌者蹤跡殊爲可怪昨閱刑部審擬廣東參革知縣劉紹汜一
摺該犯旣係與羅暹春江西同鄉而蘇昌又卽參處該犯之總督
其爲藉詞潛行報復實啟黨援朋比之風不可不悉心體究創懲
以防流弊因諭刑部堂官悉心查訊今據奏到羅暹春與劉紹汜

雖無瞻徇實跡然該御史具摺參劾不卽於蘇昌失察原案發鈔之時又不於劉紹汜審擬已經定案之後該御史亦自稱形跡之間百喙莫辨等語此等以鄉情各酬私怨其事本無實證豈對簿駁詰遽有輸情吐露然亦不致因此卽革職審問也封疆大吏果有罔上行私確據臺垣自應據實糾彈願立言亦自有體中外大臣皆經朕簡用苟其事不干大戾卽朕亦不遽加以斥罵御史雖欲自著風力亦豈得以年老大臣盡斥之爲糊塗且前如來保今如尹繼善傅森陳宏謀諸臣屢經敷歷其齒安得不老而生平奉職無愆豈遂一例槩以衰庸肆爲詆訕可乎明季科道惡習立幟分門借敢言之號行傾險之謀假公濟私無所不至爲害甚大我

朝百餘年來整綱飭紀朝政肅清斷不容有營私搏擊之人復得
稍萌故智但遏邪防弊持之不可不堅今羅暹春之奏其爲劉紹
汜而發本非有證佐可質而任意詬毀已情見乎詞且不先不後
之閒自供亦無容置喙此而陽爲不知於人心政事所關非細羅
暹春著交部嚴加議處是月蘇昌覆奏自請嚴議並下部議得
旨蘇昌降五級從寬畱任羅暹春從寬免革職加恩以主事用三
十年 上南巡 御製詩賜之曰楚粵曾宣績浙閩茲撫封外中
久歟歷聲望益春容早是心如水應知壽比松自當隨蹕輦奕葉
本從龍三十一年臺灣淡水廳屬鯤亮莊民爲生番焚殺五十餘
人同知李浚原詳報不實蘇昌奏參革職檄按察使余文儀往會

臺灣鎮派兵嚴緝並條奏安戢事宜五款一逼近番界之零星住戶悉遷附大莊一民莊酌撥弁兵移駐捍衛一近山各莊建望樓嚴守望一禁墾界外荒埔免越界滋衅一清查熟番產業民人不得侵占得旨如所議行三十三年來京 陛見 命在紫禁城內騎馬尋卒 賜祭葬如例諡恪勤子富綱見任雲貴總督

右 國史館本傳

蘇昌督粵時其屬縣有巨室橫斃人母反誣其子毆死者其案久具旬決本已下昌疑其冤復親鞫之得其實乃上疏自劾 純皇帝獎諭之因將縣令抵法亦當時督撫之罕能者秉節鉞者宜效法焉

右錄宗室昭棟撰